



**ATASSUT**

**UPA14/145-1**

**Gerhardt Petersen**

**01.04.2014**

**Siunnersuut uunga: Radiukkut tv-kkullu aallakaatitsisarneq pillugu Inatsisartut Inatsisaat nr. XX, XX.XXX 2014-imeersoq.**

(Ilinniartitaanermut, Ilageeqarnermut, Kultureqarnermut Naligiissitaanermullu Naalakkersuisoq)

Radiokkut tv-kkullu aallakaatitsisarneq pillugu Inatsisartut inatsisissaattut siunnersuut Inatsisartuni oqaluuserineqalertinnagu innuttaasut akornanni oqallisaalluarsimasoq ATASSUT-mit misissorluareerlutigut siullermeerinninnermi imaattumik oqaaseqaateqarfigissavarput:

ATASSUT-mit pingaartilluinnarparput ullut tamaasa aalaakkaasumik nutaarsiassatigut innuttaasut nunatsinni sumiikkaluartulluunniit pitsaanerpaamik kiffartuunneqarnissaat.

Tamanna qulakkeerniarlugu inatsisitigut sinaakkutarineqartut pisariaqarfiatigut nutarterneqartarnissaat soorunami ATASSUT-mit tamakkiisumik suleqataaffigisarparput suleqataaffiguassallugulu.

Matumani pingaarnerusutut KNR-ip siulersorneqarnikkut aqqissuussaanerata allangortinneqarnissaa pineqarpoq, ATASSUT-millu maluginiarparput KNR-ip siulersuisuisa siunissami katitigaanissaat pillugu annertuumik oqallittoqartoq, pingaartumik KNR-ip kiffaanngissuseqarluni politikkikkullu attuumassuteqarnani inissisimaannarnissaa pingaartinneqarluni.

ATASSUT-mit tamanna paasilluarsinnaavarput, tassami Naalakkersuisut qaqugukkulluunniit atuuttut KNR-ip ulluinnarni ingerlatsineranut sulineranullu akuliutinngilluinnarnissaat qulakkiissallugu pingaaruteqarpoq, taamaammatt KNR-imi siulersuisut tallimaannangortinneqarnissaat taakkunangalu sisamat Naalakkersuisunit toqqarneqartalernissaat ataaserlu suleqataasut akornannit toqqarneqartalissasoq siunnerfigineqarnera sukumiisumik isumaliutigisimavarput.



ATASSUT-mit Naalackersuisut paasilluarsinnaavagut eqaallisaarusummata, ilisimaneqarpormi KNR-ip ukiut ingerlanerini inissisimasarnera pitsaanerusinnaasoq, siulersorneqarnikkut eqartumik ingerlatsisoqarsimaneranik pissuteqarsimassappat tamanna soorunami iluarsineqartariaqarpoq, tassami ullumikkutut aaqqissugaatillugu soqutigisalippassuit KNR-ip siulersuisuiniipput, eqaallisaataassappallu siulersuisut piginnaasamikkut piumasaqarfigineqartalernissaat ATASSUT-mit tamanna oqaloqataaffigissallugu piareersimavugut.

Taamaattorli aamma soorunami qulakkeerneqartariaqarpoq Naalackersuisutut qaqugukkulluunniit inissisimasut KNR-ip ulluinnarni ingerlanneqarneranut arlaannaatigulluunniit akuliuttannginnissaat, taamaammat nalornissutigineqartut siunnersuutip aappassaaneerneqannginnerani qulaajaaffigineqarluarlutillu suliamut attuumassuteqartut tusarneqarnissaat ATASSUT-mit pingaartipparput.

Tamatuma saniatigut sumiiffinni lokalradioqarfiit lokal-tv-qarfiillu ulluinnarni nutaarsiassaqaqtitsinermi aliikkutassaqaqtitsinermilu annertuumik tunniussaqaqataasartut periarfissarissarlutik ingerlasinnaanissaannut Namminersorlutik Oqartussat tapersiinnaanissaminnut tunuarsimaartoqassanngitsoq ATASSUT-mit isumaqarpugut, matumanilu inatsisitigut qulakkiikkamik annertussusiliisimaneq qimanniarneqarmat tamanna lokalradionut lokal-tv-nullu sunniuteqassanersoq sukumiisumik paasisaqarfigerusupparput.

ATASSUT-mit piumasaaqaatigaarput suliaq peqqissaartumik aammalu attuumassuteqartut akornanni sapinngisamik annerpaamik paaseqatigiiffiusumik suliaq ingerlanneqassasoq, taamaammallu kaammattuutigissavarput piffissaq pisariaqartinneqartoq atorlugu suliaq ingerlanneqassasoq.

Taamatut oqaaseqaateqarluta inassutigissavarput siunnersuut aappassaaneerneqartinnagu Inatsisartut Kultureqarnermut, Ilinniartitaanermut, Ilisimatusarnermut Ilageeqarnermullu Ataatsimiititaliaanut suliassanngortinneqassasoq.